



Utoqqalinersiaqarneq pillugu Inatsisartut inatsisaannik nr. 20, 23. November 2015-imeersumik UPA2021-mut allangortitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut, taamaalilluni pisortanit utoqqalinersianik pisartagaqarsinnaaneq 66-inik ukioqalernermit pisussanngorlugu allangortinneqarluni.

(Partii Naleqqap Inatsisartunut ilaasortaataitai)

(Siullermeerneqarnera)

Kalaallit Nunaanni utoqqalinermit pensionisiat tunngaviusumik aningaasartaata Qallunaat Nunaanni utoqqalinermit pensionisiat tunngaviusumik aningaasartaannut Qallunaat Nunaannilu soraarnerussutisiamik aqqissuussinerup nalimassarnissaanut Naalakkersuisut UKA2021-mi siunnersuummik saqqummiuseqqullugit peqquneqarnissaat pillugu Inatsisartuni aalajangiiffigisassatut siunnersuut.

(Inatsisartunut ilaasortaq Peter Olsen, Inuit Ataqtigiit)

(Siullermeerneqarnera)

Soraarnerussutisiaqarneq inuiaqatigiit ingerlalluartut akornanniittuartussatut Demokraatinit isigineqarpoq. Nunatsinni utoqqalinissaq toqqissisimanartuullunilu ajunngitsuussaaq. Taamaamat naalakkersuinerup tungaaniit soorarnerussutisiaqarnerup pitsaanerpaaffianiitinnissaa eqqarsaatigalugu iliuuserineqarsinnaasut tungitsinniit eqqumaffigineqartuarnissai pingaaruteqarpoq.

Ullumikkut siunnersuutit marluk sammisussaavagut.

Siullermit pineqartoq tassaavoq soraarnerussutisiaqalernissamut ukiut killigitinneqartut 66-inut apparneqarnissaat. Siunnersuut taanna Demokraatinit isumaqatigineqanngilaq.

Nakorsaatit ima ineriartortigipput inuit utoqqaligaluttuinnalernikuullutik, tamanna soorunalimi inummut ilaqaataasunullu ajunngitsorujussuuvoq. Nakorsaatillu ineriartornerat ima aamma isumaqarpoq sivisunerusumik inuunerinnerusalertugut taamaammallu amerlanerit sivisunerusumik sulisarnissaat ilimanaateqarpoq. Tamarmilli taamaassinnaangillat. Inuit ilai timimut assoroornartunik suliffeqarput sukkanerusumillu nungullassutigalugu. Inuit taakku ullumikkut siusinaarlutik sulisinnaajunnaarnissaminut periarfissaqarput, taamaaliornikkut isertitassaqarnissaat qulakkeerneqarluni.

Immaqaana innuttaasut ilaannut sivisuumik suliffeqarsimasunut imaluunniit nungullarsimasunut siusinnerusukkat soraarnerussutisiamik periarfissamik pilersitsisoqarnissaa eqqarsaatigisariaqaripput? Isiginnittariaaseq taamaattoq Naalakkersuisut utoqqarnut suleriusissamik suliaqarnerannut ilanngunneqartariqarpoq.



Naggataatigut uparuarusuppara siunnersuut una ukiumut 35 aamma 50 mil. Koruunit akornanni inuiaqatigiinnut akeqartartussaavoq. Eqqumiigivara Partii Naleqqamiit siunnersuuteqartut siunnersuutiminni aningaasalersuinissaq pillugu siunnersuuteqarsimangitsut. Demokraatit isumaqarput tunngaviusumik peqqinnartuussasoq partiit pimoorullugu politikikkut suliallit siunnersuusioraangamik aningaasalersornissaa ilanngullugu siunnersuuteqartassasut, taamaalilluni politikikkut suliat imaaginnaalissannginnamik kikkut inuiaqatigiinni eqimattaat ilaannut anginerpaanik tunniussassaqaarsinnaanersut.

Siunnersuutip aappaa tassaavoq, soraarnerussutisiat tunngaviusumik aningaasartai utoqqalinermi pensionisiat tunngaviusumik aningaasartaata assigissagai. Siunnersuut taanna 30 millioner koruunit ataatilaarlugit akeqassaaq, tassanittaaq siunnersuuteqartup - massakkut Inuit Ataqtigiit – aningaasalersornissaanut siunnersuuteqarnissartik pisariaqarsorisimangilaat. Uparuaaqqittariaqarpunga aningaasaqarnikkut kingunerisinnaasai ilanngunneqarsimangippata tamanna siunnersuutip uppernassusaanut annikillisaataasarpoq.

Tamanna oqaatigereerlugu qularutissaanngilaq soraarnerussutisiat qaffasinnerusumik soraarnerussutisiaqalerniarlutik Danmarkimut nuunnissartik toqqartaraat. Ilaquttat qimallugit kiserliornarsinnaammat tamanna assorsuaq ajuusaarnarpoq. Aningaasallu kisiisa peqquutigalugit taamaattoqartarsimappat aatsaat iluamik tamanna ajuusaarnarpoq.

Taamaammat Naalakkersuisut utoqqarnut suleriesissiamik suliaqarnerat Demokraatit tapersersorpaat, tassani tamanna isiginiarneqarmat, taamaattorli ataatsimut isiginningsumik soraarnerussutisiat tunngaviusumik aningaasartaanik qaffaanarluni aalajangiineq tapersingilarput. Naalakkersuisut uparuaanerat eqqoqqissaartumik malillugu tassa imaappoq soraarnerussutisiat tunngaviusumik aningaasartai qaffassappata taava ineqarnermut tapit appassapput, taamaammallu imaatarsinnaavoq soraarnerussutisiat tunngaviusumik aningaasartai qaffanneqassappata soraarnerussutisialik assigiinngissutaanik malussarnaviangitsoq.

Suliassaq iluamik suliarinnartigu. Utoqqarnut suleriesissiamik tamanik isiginnittumik, utoqqarnut soraarnerussutisianullu tunngasunik tamanik pingaartitsisumik, suliaqarnissatsinnut suleqatigiinnarta.

Taamatut oqaaseqarluta siunnersuutit marluk itigartitsissutigineqarnissaat Demokraatiniit innersuunneqarpoq.